

Génesis

E promé buki di Beibel riba su mes ta un obra maestral. Stephen R. Schrader a skirbi den su introdukshon di e promé buki di Beibel, “Génesis ta informativo den su kontenido, bunita den su organisashon, i un inspirashon den su atrakshon. Tin algu di balor pa tur hende. Génesis ta atraktivo pa e científiko, e historiadó, e teólogo, e ama di kas, e kunukero, e biahero, e hòMBER òf muhé di Dios. E ta un komienso apropiá pa Dios Su storia di Su amor pa hende, e *Buki di Komienso*.”

Ademas, Génesis ta unda tur kos den universo ta kuminsá. E buki ta konta di un komienso tras di otro. Por ehèmpel, den e promé 11 kapítulo, e buki ta papia di orígen di mundu (1:1-25), e promé hende hòMBER i hende muhé (1:26-28; 2:7-23), introdukshon di un dia den shete pa sosiegu (2:2-3), Dios Su promé palabranan na hende (2:16), Dios Su promé mandamentu pa hende (2:17), inisio di matrimonio (2:21-25), e promé piká (3:1-7), introdukshon di salbashon i e Salbador (3:15), e promé nasementu (4:1), e promé famia (4:1-2), e promé morto (4:8), orígen di sakrifisionan (4:3-4), e promé stat (4:17), e promé instrumènt musikal (4:21), komienso di sivilisashon i kultura (4:17-26), e promé rebog (9:12-17), komienso di rasanan i nashonnan (10-11), introdukshon di idiomanan (11:1-8), orígen di e puebel hebreo (11-12), èts. No tin duda ku Génesis ta un buki importante.

I. IMPORTANSIA DI E BUKI

Génesis ta kontené informashon di tur sorto i ta present’é na diferente forma. Nos por nota e importansia di e promé buki di Beibel for di diferente ángulo:

A. GÉNESIS SU IMPORTANSIA LITERARIO

E buki di Génesis ta importante komo literatura. Su storianan ta mantené interes di tantu mucha komo adulto. E outor ta move di ún klimaks pa otro na un forma efektivo.

E buki ta kontené storianan sumamente bunita, detayá i emoshonante. Kua storia por surpasá e emoshon di Abraham su sakrifisio di Isaak (kapítulo 22)? Kua storia por kompará den bunitesa ku e storia di Jose pordonando su rumannan ku a maltrat’é (39-50)? I kiko nos por bisa di hopi otro storia masha interesante den Génesis: e relato di kreashon, Adam i Eva, kaída di hende, Kain i Abel, Noe i e arka, tórno di Babel. Hopi storia di Abraham ta destaká, huntu ku su esposa, Sara. Ademas tin storia tokante Sodoma i Gomora, selekshon di Rebeka komo esposa di Isaak, Jakòb ta hòrta e bendishon di Esau, Jakòb i e trapi pa shelu, i Jakòb su noviasko ku Raquel, èts. E buki di Génesis ta yen di storia ku ta kapta i mantené atenshon di e lesadó.

B. GÉNESIS SU IMPORTANSIA HISTÓRIKO

Maske Génesis no ta un buki di historia, sinembargu e ta proveé un fundeshi nesesario pa tur historia: pa orígen di hende, pa orígen di nashonnan, orígen di idiomanan, orígen di Israel, èts.

E buki ta hunga un ròl importante pa ku historia. E ta habri ku kreashon i ta klousurá mas òf ménos na aña 1800 B.C. (morto di Jose).

Tin teksto den Génesis ku hende nunca lo por komprendé maske kuantu ku nan ta investigá. E ta informashon ku Dios so por a revelá. Por ehèmpel, ningun hende tabata presente ora mundu a wòrdu kreá. Dios so por a revelá e informashon ei. Pues, Génesis ta presentá origen di mundu pa medio di revelashon di Dios na hende; e no ta un relato ku hende a skirbi.

Relashoná ku esei, ta bon pa nos para ketu un ratu i pensa tokante tempu pre-histórico—e era promé ku hende a skirbi historia. Pasobra ningun hende tabata presente ora universo a originá, tur teoria sin eksepsjon tokante komienso di mundu mester wòrdu aseptá pa medio di fe. Tantu storia tokante orígen di mundu i hende ku ta puru spekulashon mitológiko, fantasia poétiko, leyenda ridíkulo, òf surgerensianan insiertu. Siensia no por proba ningun teoria ku siertidat, pasobra hamas hende no por opservá e orígen. Ma en realidat, Génesis su splikashon di kreashon ta surpasá tur otro splikashon. Pues, maske for di punto di bista sientífiko, kreashon ta solamente un teoria, e kreyente ta aseptá e relato di Génesis 1-2 komo e úniko splikashon satesfaktorio pa orígen di mundu i tempunan pre-histórico.

C. GÉNESIS SU IMPORTANSIA FILOSÓFIKO

Bo punto di bista pa ku Génesis—especialmente kapítulo 1 i 2—lo determiná bo filosofia di bida. Tin tres pregunta filosófico kardinal: F’oi unda mi a bin? Pakiko mi ta eksistí? I unda mi ta bai? Génesis ta kontestá tur tres pregunta. Ma su énfasis ta riba e pregunta, “Fo’i unda mi a bin?”

Si bo ta deshasí di e ún echu ku Dios a krea mundu i tur kos den mundu inkluiendo hende (manera evolushonistanan ta siña), esei lo afektá henter bo bida. Si bo no ta kere ku bo a wòrdu kreá, bo bida lo ta sin proposito, bo por biba manera bo ta haña ta bon, no tin un plan pa bo bida, no tin speransa pa futuro, i bo no tin ku kontestá na ningun Ser Divino despues di e bida aki.

Evolushon ta siña ku hende ta mehorando. En kotraste, Génesis ta siña ku hende ta peorá. Keriendo loke Génesis ta siña ta kambia henter bo perspektiva di bida.

D. GÉNESIS SU IMPORTANSIA SOSIOLÓGIKO

Sociologia ta e estudio di e komunidad di hende. Génesis ta presentá e famia, basá riba matrimonio, komo e fundeshi di e komunidad. E buki ta duna di konosé ku nashonnan ta konstruí riba e fundeshi di famianan i e nashon ta bou di outoridat divino i pues mester kontestá na Dios. Maske e no ta un buki biográfiko, nos por siña hopi tokante bida i kultura di diferente persona i pueblonan for di su páginanan.

E. GÉNESIS SU IMPORTANSIA BÍBLIKO

Den un sintido, nor por bisa ku Génesis ta e buki mas importante di henter Beibel. Mayoria buki di Beibel ta referí na contenido di Génesis di un òf otro manera.

Maske Génesis no ta kontené hopi siñansa doktrinal hañá den Tèstamènt Nobo (por ehèmpel, kon hende por haña salbashon pa medio di Hesu-Kristo), tòg nos por argumentá ku Tèstamènt Nobo ta basá riba Tèstamènt Bieu, Tèstamènt Bieu ta basá riba Pentatuk, i Pentatuk ta basá riba Génesis. Pues, si bo no ta komprendé Génesis, bo no por komprendé e restu di Beibel.

Asta nos por ta mas spesífiko. Talbes nos por bisa ku e promé diesun kapítulo di Génesis ta e kapítulonon mas importante di e 1189 kapítulo di Beibel. Si bo ta komprendé Génesis 1-11 korekto, anto bo tin un fundeshi sólido pa komprendé e otro 1178 kapítulo.

F. GÉNESIS SU IMPORTANSIA TEOLÓGIKO

Génesis no ta prinsipalmente un buki sientífiko, biográfiko, sosiológiko, históriko, maske e ta kontené esei. E ta primeramente un buki *teológiko*. Ma e no ta un buki di teologia sistemátiko, unda tur e doktrinanan ta organisá den un òrdu lógiko.

Por yama e buki di Génesis e “orígen di tur teologia (doktrina)”. Génesis ta nesesario pa tur otro revelashon di Beibel. Para ketu pensa un ratu kuantu nos lo komprendé di doktrina si e buki di Génesis no a eksistí. E buki ta *introdusí* hopi siñansa teológiko.

Nos no mester lubidá ku den pasado kreyentenan no tabatin tur e informashon doctrial ku nos tin despues ku Tèstament Nobo a keda kompletá. Ademas, e hendenan den era di rei David tabatin mas Skritura, i pues mas komplementu doktrinal, ku hende den era di Abraham. Pues, Dios Su revelashon ta bira mas amplio ku tempu.

Klaramente Génesis no ta splika kada doktrina na plaka chikí. E Skrituranan ku ta sigui despues di Génesis ta elaborá riba hopi teologia ku ta hañá na un forma básiko den e buki aki. Por ehèmpel, e promé buki di Beibel ta kuminsá kontestá e siguiente preguntanan importante: Ken ta Dios? Kuantu dios tin? Kon mundu a originá? Kon hende a originá? Kiko ta orígen di bon i malu (piká)? Kon biní hende a hasi piká? Tin speransa di redenshon despues ku hende a hasi piká? Kon hende pekadó por hasi bon ku Dios? Kon hende por agradá Dios? Kon piká a plama? Dios ta kastigá piká? Kon hende a plama riba mundu? Di unda idiomanan a bin? Hende por papia ku Dios—i Dios ta skucha?

Bisá di otro manera, si nos ta eliminá for di Beibel tur siñansa introdusí den Génesis, anto nos mester deshasí di e siguiente doktrinanan: Doktrina di hende—pasobra hende no a ser kreá den imagen di Dios i no ta pekadó awor. Doktrina di salbashon—hende no tin mester di salbashon, pasobra hende no a hasi piká. Doktrina di Kristo—hende no tin mester di un Salvador. Iglesia—ta ilógiko pa reuni pa adorá Dios. Doktrina tokante profesia—no tin mester di tene kuenta ku shelu i fièrnu i otro eventonan eskatológiko. Doktrina di Beibel—por deshasí di Beibel kompleto pasobra e ta inkonfiabel.

Ripará atrobe ku Génesis ta *introdusí* hopi siñansa ma no ta hasi un estudio ekstensivo. (1) Génesis ta introdusí teologia—e estudio di Dios. E buki ta revelá ku ún Dios ta eksistí. E ta eksistí komo Kreador, Rei, Redentor. E ta un Dios soberano, todopoderoso, hustu, fiel, pasiente, misericòrdioso, bèrdat i ta kla pa pordoná. Asta e ta duna indikashon di e trinidad divino. E buki ta laga sa tokante Spiritu Santu. Ma Génesis no ta revelá mashá di Dios Su proposito, naturalesa, i métodonan.

(2) Génesis ta introdusí antropologia—e estudio di hende. E promé buki di Beibel ta presentá hende komo un kombinashon di stòf sinembargu kreá den imagen di Dios. Hende ta bou outoridat (nan ta responsabel na Dios) ma tambe tin outoridat (riba kreashon). E ta muestra ku hende por papia ku Dios. Ma e buki no ta revelá hende su destino final. (3) E promé buki di Pentatuk ta introdusí hamartiologia—estudio di piká. Génesis ta siña ku piká ta rebelion kontra Dios i ta basá riba inkredulidat. Tambe, e ta siña ku hende, ku a ser kreá perfekto originalmente, a hasi piká i a sufri—i ta sigui sufri—Dios Su kastigu.

(4) Soteriologia—e estudio di salbashon—ta un otro doktrina introdusí. Génesis ta demonstrá kla ku hende pekadó tin mester di salbashon i ku salbashon mester bin for di Dios. E ta laga sa ku hende por ta hustifiká pa medio di fe. Ma e buki no ta komuniká kla kon esei por sosodé. Tambe e ta laga sa tokante supstitushon ora Abraham a sakrifiká un chubatu na lugá di Isaak. (5) Génesis ta introdusí angelologia—estudio di angelnan. Tantu bon angel komo mal angel (Satanas) ta aparesé den e buki. E ta laga sa ku Satanas ta tenta i enkurashá hende pa hasi piká. Tambe e ta indiká ku e Salvador lo triunfá riba Satanas. Ma orígen di angelnan i Satanas ta keda un misterio den e buki.

Kasi tur otro revelashon den Skritura ta basá riba e buki aki. No ta un eksagerashon pa bisa ku kristianismo ta dependé di e eksaktitut di e buki di Génesis. Ora mishoneronan ta tuma kontakto ku hende ku no tin ningun konosementu di Beibel, nan ta kuminsá instruí nan ku e buki di Génesis. Esei ta lógiko. Promé ku hende por konosé Dios komo Salvador, nan mester konos’E komo Kreador di hende i mundu.

II. NÒMBER DI E BUKI

E Skrituranan hebreo (“Tanak”) ta organisá otro for di nos Tèstamènt Bieu. Ma Génesis tambe ta e promé buki di Tanak. E ta e promé di e sinku buki di Moisés, esta e Pentatuk, konosí pa hudiunan komo Torá.

E bukinan di Génesis te Deuteronomio na idioma hebreo a haña nan nòmber for di e promé palabra(nan) importante den e buki. Esaki tabata un kustumber normal den tempunan antiguo. Pues, e nòmber hebreo tabata BERESHIT, tumá for di 1:1. BERESHIT ta nifiká “na prinsipio” òf “na komienso”.

Ora e buki a wòrdu tradusí na idioma griegu (e tradukshon konosí komo Septuiginta òf LXX), nòmber di e buki, a ser tumá for di e palabra hebreo klave di e buki, TOLEDOTH, den 2:4, “Esaki ta buki di GENESEOS (γενεσεως) di e shelunan i tera...” Despues Beibel a wòrdu tradusí na idioma latin (e tradukshon konosí komo Vulgata). E palabra latin GÉNESIS a wòrdu usá komo título. GÉNESIS ta nifiká “komienso, orígen, fuente” meskos ku nifikashon di e palabra hebreo. Klaramente, e nòmber na Papiamento ta bin for di e nòmber latin.

III. OUTOR DI E BUKI

Nos ta sali for di punto di bista ku Dios ta Outor di tur 66 buki di Beibel. “Tur Skritura ta inspirá pa Dios...” (2 Timoteo 3:16). Ma nos tambe ta kere firmemente ku Dios a usa hende pa skirbi e teksto, usando nan personalidat. “...hòmbènan santu di Dios a papia, inspirá dor di Spiritu Santu” (2 Pedro 1:21). Pues, ora nos ta purba determiná ken e outor ta, maske nos ta konvensé ku Dios ta e Outor, nos ta pensa di e persona ku Dios a usa pa skirbi e teksto.

En kontraste di hopi buki di Beibel, Génesis no ta menta nòmber di e outor—i ni asta ta duna idea ken e eskritor tabata. Talbes e outor su intenshon tabata pa keda onónimo. Òf, ta pusibel ku su identidat tabata bon konosí tempu ku el a skirbi e buki, i pues, e no a hañé nesesario pa identifká su mes den e buki.

Hopi teólogo liberal ta konvensí ku Génesis ta un kompilashon di mito i fábulanan, skirbí pa diferente outor. Kuantu outor? Nan no sa. Ma nan ta sigur ku ta impusibel ku e buki a wòrdu skirbí pa ún outor humano so. Algun di nan ta haña ku Génesis a ser skirbí na komienso di e monarkia di Israel (1050-1000 B.C.), hasiendo uso di diferente dokumento ku Moisés por a skirbi. Otronan ta kere ku e buki a wòrdu skirbí durante òf na fin di eksilio (586-500 B.C.).

Un otro pensamentu popular ku nan a proponé ta e teoria JEDP. Segun e teoria aki, tin kuater outor di Pentatuk ku a biba na diferente era. Asta nan ta kere ku nan por identifká nan: Yahwista (J), Elohista (E), Saserdote (P), i Deuteronomista (D). Nan skirbimentunan eventualmente a ser kompilá i revisá pa forma un solo storia, Pentatuk, di kua Génesis ta forma parti. E kompilashon aki a wòrdu kompletá mas òf ménos na aña 400 B.C.

Fuera di e echu ku teólogonan liberal ta motivá pa rechasá tur aspekto sobrenatural den Beibel, e teoria ei no ta kuadra ku e evidensia prinsipal di e buki. Tin diferente indikashon ku e buki tin ún solo outor. Un ehèmpel di esaki ta e riptishon di TOLEDOTH: “historia” òf “generashonnan” ku ta mensioná dies biaha dor di henter e buki. (Esaki lo ta spliká mas aki ratu.)

Tambe por nota kon e outor ta trata ku e diferente generashonnan ku e ta lista. E eskritor klaramente ke konsentrá riba e antepasadonan i desendientenan di Abraham. Pa hasi esei, por lo ménos sinku biaha e ta lista e generashonnan prinsipal último. Por nota ku generashonnan di Kain ta mensioná (4:17-24) promé ku generashonnan di Sèt (4:25-26). Despues, generashonnan di Jafet i Kam ta aparesé (10:2-20) promé ku esunnan di Sèm (10:21-31). Èts. Esaki tambe ta duna indikashon ku e buki tin ún solo outor.

I ken por ta e ún outor humano ku a skirbi e buki? Te mas òf ménos 1800 aña despues di Kristo, tantu hudiunan komo kristiannan a kere unanimamente ku Moisés tabata e eskritor di e buki, maske el a biba 300 aña despues di klousura di e eventonan ku el a deskribí den Génesis. E evidensia ta mustra dede riba su persona.

Ki evidensia tin ku Moisés a skirbi Génesis?

- Klaramente Moisés tabatin e edukashon i abilidadat pa skirbi un buki asina. Segun Echunan 7:22, “Moisés a wòrdu eduká den tur siñansa di e egipsionan”. Entre otro, Moisés a skirbi rekòrtnan, manuskritonan, i storianan verbal. Ken lo tabata mihó prepará pa skirbi e buki fuera di Moisés?
- Moisés tabata un profeta ku a gosa komunian íntimo ku Dios, asta pa dianan largu riba Seru Sinaí. Konosiendo Dios bon, e por a skirbi e buki ku ta inkluí revelashonnan di Dios.
- Pa síglonan, e hudiunan tabata yama e promé sinku buki di Beibel e “bukinan di Moisés” (Nehemias 13:1)—i Génesis ta un di e sinku buki ei den nan Torá (Pentatuk).
- E sinku buki di Pentatuk ta forma un unidat. E informashon hañá den e bukinan di Eksodo te Deuteronomio ta nesesitá un fundeshi manera Génesis. Ta probabel ku esun ku a skirbi Eksodo, Levítiko, Numbernan i Deuteronomio, lo a yena e nesesidat aki dor di skirbi e buki di Génesis tambe. G. T. Manley a rasoná: “Ningun hende te ainda no a argumentá ku Génesis no ta forma un unidat huntu ku e otro kuater buki. Pues, si Moisés ta aseptá komo outor di e sekshonnan legal (Eksodo te Deuteronomio), fásilmente por asept’é komo outor di Génesis.” Génesis 50:24 klaramente ta prepará e lektor pa e buki di Eksodo: “...Dios siguramente lo pèrkurá pa boso i lo saka boso for di e tera aki hiba na e tera ku El a primintí Abraham, Isaak i Jakòb bou di huramentu”.
- Eksodo 1:1 ta kuminsá ku e palabra “i” na idioma hebreo, dunando impreshon ku e outor lo a skirbi algu promé ku esaki.
- Lògikamente e relato di Eksodo 1:1-7 (i siguiendo) ta un bunita kontinuashon di e buki di Génesis.
- No tin duda ku Moisés a skirbi sikiera siertu parti di e bukinan di Pentatuk (Eksodo 17:14; 24:4,7; 34:27; Numbernan 33:2; Deuteronomio 1:1; 31:9,24; èts. Nos lo mira esaki mas den detaye ku estudio di kada buki). Den buki di Levítiko, e palabranan “SEÑOR a papia ku Moisés (i Aaron)” ta usá 35X anto ta sigui e relato ku aparentemente Moisés a skirbi. Por argumentá: Si Moisés a skirbi e tekstonan aki, ta lògiko ku e lo a skirbi e informashon rònt di e tekstonan tambe.
- Pa establesementu di un nashon uní, Israel, ta esensial pa nan sa nan historia. Tabata nesesario pa nan sa di Dios Su promesanan na Abraham i su desendientenan. Esei ta presis loke e buki di Génesis ta hasi. Outor di e buki di Génesis a hasi uso di informashon di síglonan anterior. Ta parse ku Moisés, fundadó di e nashon di Israel, tabata esun motivá pa kompilá e informashon ku guiansa di Spiritu Santu
- Sirkumsishon ta introdusí i spliká den Génesis 17. Juan 7:23 ta bisa ku sirkumsishon tabata parti di lei di Moisés. Ta bèrdat ku Eksodo 12:48 i Levítiko 12:3 tambe ta referí na sirkumsishon. Ma ta visto ku e informashon di Génesis ta nesesario pa hasi e otro tekstonan komprensibel, hasiendo Génesis parti di e lei di Moisés.
- Hesus i e outornan humano di Tèstament Nobo a kere ku Moisés tabata outor di Pentatuk kompleto, i pues, outor di Génesis tambe (Mateo 8:4; 19:7-8; 23:2; Marko 1:44; 7:10; 10:3-4; 12:26; Lukas 5:14; 16:29-31; 20:37; 24:27,44; Juan 1:17; 5:45-46; 7:19,22-23).
- E apòstelnan a kere ku Moisés a skirbi Pentatuk, inkluiendo Génesis (Echunan 3:22; 13:39; 15:1,5,21; 26:22; 28:23; Romanonan 10:5,19; 1 Korintionan 9:9; 2 Korintionan 3:15)
- Manera nos a indiká kaba, tradishon antiguo i konfiabel di tantu hudiunan komo kristiannan ta kere ku Moisés tabata e outor di e buki. Por ehèmpel, Talmud di Yerusalèm (siñansa dokumentá di rabínan hudiu) i eskritornan hudiu di apokrafia (e bukinan ku katólikonan ta yama “deuterokanónico”) ta reflehá e kreensia aki (Eklesiastikus 45:4; 2 Makabeonan 7:30).

- E historiadó hudiu renombrá, Josefus, a laga sa ku Moisés a skirbi e buki di Génesis (*Antiguidatnan* 4:8:45; *Kontra Apion* I.8). Tambe e skirbimentunan di Philo ta di akuerdo (*Bida di Moisés* 3:39).
- Lídernan di iglesia antiguo tabata konvensé ku Moisés a skirbi e buki.

Maske nos no por bisa ku 100% siguridat ku Génesis a ser skirbí dor di Moisés, di bèrdat, “Ningun motibu a ser produsí ku ta eksigí kategórikamente pa bandoná e kreensia ku Moisés ta e outor”. Pues, nos ta konkluí ku Moisés a skirbi e buki di Génesis.

IV. SKIRBIMENTSU DI E BUKI

Den ki era i bou di ki sirkunstansia e buki di Génesis a wòrdu skirbí?

A. FECHA I SITIO DI SKIRBIMENTSU DI E BUKI

Si e buki di Génesis no ta duna nòmber di e outor, ta muchu mas difísil pa determiná e fecha eksakto ku e buki a wòrdu skirbí.

Nos a konkluí kaba ku Moisés tabata e outor. Pues, ki tempu Moisés a skirbi e buki? Ta fásil pa divide e 120 aña di Moisés su bida den tres periodo di 40 aña. Den kua di e tres era Moisés lo a skirbi e buki?

1. Pusíbelmente Moisés a skirbi e buki di Génesis durante e promé 40 aña di su bida, tempu ku e tabata un prens na Egipto.

Un argumento ku ta favoresé esaki ta ku Moisés, bibando den palasionan komo un prens di Egipto, tòg tabata ke sa mas di su identidat hebreo i a hasi un estudio di esaki. E lo por a hasi uso di e bibliotekanan di Egipto. Talbes tabata su estudio preparando pa skirbi Génesis ku a inspir’é pa para huntu ku su rumannan hebreo!

Di otro banda por argumentá ku probabelmente Moisés no a identifiká asina tantu ku e pueblo di Israel durante e promé 40 aña di su bida. Komo resultado ta dudoso ku Moisés lo a mira nesidat pa un buki asina, bibando den palasionan di Egipto.

2. Kisas Moisés a skirbi e buki di Génesis durante e 40 aña ku e tabata un wardadó di karné na Madian, te ora e tabatin 80 aña di edat.

Sigur Moisés lo tabatin tempu pa skirbi e buki mientras e tabata kuida e karnénan di su suegro. Ma atrobe tin e pregunta si Moisés lo a mira nesidat pa un buki asina, bibando den sabananan di Madian, isolá for di su pueblo hebreo, sin sa si hamas e lo mira nan. Si Moisés a skirbi e buki durante e periodo aki, ta probabel ku e lo a skirbié despues ku Dios a yam’é pa libra Israel for di Egipto (Eksodo 3-4). Den e kaso ei, talbes Moisés a hasi e estudio di historia di Israel despues ku Dios a yam’é ma promé ku el a deklará abiertamente na Egipto ku Dios a yam’é pa libra Israel for di esklabitud. Ma esei tampoko ta parse rasonabel.

3. Ta muchu mas probabel i lógiko ku Moisés a skirbi e buki di Génesis durante e último 40 aña di su bida, tempu ku e tabata líder di Israel.

Ta opvio ku Moisés a skirbi e otro kuater buki di Pentatuk durante e periodo di tempu ku Israel tabata dwal den desierto. Ta lógiko ku e kuater buki aki lo nesidat un introdukshon. Moisés lo a mira e nesidat pa Israel sa di su historia...su orijin. Moisés por a skirbi Génesis e tempu ei.

Di otro banda, tin pregunta si Moisés lo tabatin dokumentonan nesario pa skirbi e buki di Génesis durante e tempu aki. Ma no tin duda ku Moisés tabatin dokumentonan huntu kun’é pasobra e ta referí na bukinan asina den Eksodo te Deuteronomio. Pues, ta probabel ku e lo tabatin sufisiente dokumento pa skirbi Génesis tambe.

Nos no sa e fecha sigur, ma ta probabel ku e buki a wòrdu skirbí entre 1445 i 1405 B.C.

B. KOMPILASHON DI E BUKI

E último eventonan di Génesis a sosodé por lo ménos 300 año promé ku Moisés a nase. Pues, nos tin ku hasi e pregunta, di unda Moisés a haña e informashon pa skirbi e buki di Génesis? Sin duda tin por lo ménos dos fuente:

1. Revelashon di Dios

Moisés tabata un hòmer bon eduká. Nos ta kòrda ku “Moisés a wòrdu siñá den tur sabiduria dje egipsionan...” (Echunan 7:22). Ma tòg lo tabata impusíbel pa e sa tokante sierto echu si Dios no a revelá esei. Nos ya kaba a opservá ku ningun hende por sa tokante kreashon, pasobra ningun hende tabata presente tempu Dios a krea mundu. Pues, Dios mester a revelá sierto informashon pa hende por a skirbié. Na ken Dios a revelá e informashon aki?

Probabelmente Dios a revelá e relato tokante kreashon na Adam i Eva. Sin duda Dios a krea nos promé mayornan sumamente inteligente, i ta probabel ku nan mes a inventá un sistema di skirbi. Ta hopi pusíbel ku nan a skirbi e promé relato di kreashon ku Dios a revelá na nan i ku Moisés a kopia esaki

Dios por a revelá tur e informashon den e buki di Génesis na Moisés. Ma esei no ta porbabel.

2. Dokumentonan i tradishonnan eksistente

Algun ta bou di impreshon ku hende di e era promé ku Moisés no a progresá sufisiente ainda ku nan por a siña lesa-skirbi. Ma esei ta leu di bèrdad.

- Klaramente diferente buki a eksistí ya kaba durante e promé añanan di Israel su eksistensia (Numbernan 21:14; Josue 10:13).
- E echu ku den era di Jakòb tabatin un “seyo” (Génesis 38:18), ta indiká ku un forma di identifikashon (talbes skirbimentu) a eksistí por lo ménos 500 año promé ku Moisés.
- Arkeólogonan a deskubrí na Ur di kaldea—e stat ku Abraham a bandoná—bibliotekanan ku a kontené miles di buki, dikshonario, gramatika, ensiklopedia, buki di matemátika, astronomia, geografia, religion, polítiká, èts. No tin duda ku tabatin skirbimentu hopi año promé ku esei tambe.
- Segun Génesis 2:19-20, Adam a duna nòmber na tur bestia, kategorisá nan, èts. Ta totalmente lógiko pa asumí ku esei lo a nesesitá skirbimentu. Kon Adam i su desendientenan por a kòrda nòmber di tur bestia i kada kategoria si Adam no a lista nan pa nan por tin un rekòrt permanente?

Ta opvio ku hende por a lesa-skirbi. Pues, sin duda dokumentonan a eksistí ku a trata ku orígen di mundu i puebel di Israel. Moisés lo a hasi uso di dokumentonan ku a eksistí durante e era ei bou guia di Spiritu Santu. Sigur e lo a usa dokumentonan pa skirbi e lista di nòmber (Génesis 4-5,10-11,14,25,36,46) pa kompilá su buki.

Asta si nos ta sali for di punto di bista kiboká ku hende den e era ei no por a lesa-skirbi te era di Jose, tòg nos por ta sigur ku e relato tokante kreashon ta altamente konfiabel maske un generashon lo mester a konta e siguiete generashon nan historia oral. (Tumando e lista di generashonnan mensioná den Génesis 5 i 10, nos ta mira ku Adam a biba 930 año. Adam a biba te tempu di Lamek (tata di Noe). Pues, Adam mes por a konta Lamek i Lamek por a konta Sèm, yu di Noe. Sèm tabata na bida ainda durante era di Abraham i Isaak. E mes por a konta nan tokante Dios Su revelashon di komienso di universo. Loke ta importante pa kompandé ta ku hende a biba hopi año e tempu ei. No tabatin hopi bisa bisa—permitiendo hopi eksagerashon òf echunan kiboká pa infiltrá e storia. Pues asta si tabatin solamente tradishon òf storianan verbal durante e tempu ei, e storianan lo ta sumamente konfiabel, maske memoria di hende no ta asina sigur ku un dokumento.

Tin spekulashon ku e echu ku tin 10 òf 11 sekshon den e buki di Génesis ku ta enkabesá pa e palabra TOLEDOTH (“historia” òf “generashon”) talbes por indiká ku e outor a hasi uso di 10 òf 11 diferente dokumento familiar (2:4; 5:1; 6:9; 10:1; 11:10,27; 25:12,19; 36:1,9; 37:2).

Esaki por indiká ku pusibelmente e ektor a kompilá, organisá i redaktá e informashon di Génesis; hasiendo uso di diferente dokumento.

Ta lógiko pa pensa ku e buki di Génesis ta un kombinashon di estudio di dokumentonan i di revelashon di Dios.

V. PROPOSITO DI E BUKI

Kiko ta proposito di e promé buki di Beibel? E outor di Génesis no ta mensioná e proposito di e buki na un forma dirèkt. Komo resultado, studiantenan di Beibel ta mira diferente proposito pa e buki di Génesis. Ma nos lo konsentrá riba dos proposito spesífiko. Sin duda e outor ke introdusí e lesadó na e Dios etèrno, pa revelá na hende Su persona, Su proposito, Su trato ku Su kriaturanan mientras E ta hasi Su boluntat. Ma tin un proposito mas spesífiko?

- Nos ta haña ku e proposito prinsipal di e buki ta pa konta di e komienso. Sigur Génesis ta splika komienso di mundu i hende (e storia for di Adam te Abraham). Ma pa ser mas eksakto, e énfasis di e promé buki di Beibel ta e origen di e pueblo skohí di Dios (e storia for di Abraham te Jose).

E outor no a konta tur historia di tur nashon di e era ei. Ta visto ku e eskritor tabata hopi selektivo. Segun R.C. Leupold, “E buki su meta ta pa relatá kon Israel a ser selektá for di e nashonnan di mundu pa bira Dios Su pueblo skohí”. Leupold ta agregá ku debí ku Dios no a skohe e patriarkanan di Israel pasobra nan tabata asina bon hende, por bisa ku Génesis tambe ta “un storia di Dios Su gracia estableiendo Israel pa Su mes komo Su puebel.”

Abraham (i su desendientenan) ta e persona sentral di e buki. Por bisa ku e teksto prinsipal di e buki ta Génesis 12:1-3. For di e teksto ei, por para wak patras den historia (Génesis 1-11), i mira kon Dios a selektá Abraham for di tur e nashonnan i personanan. (Ta manera un trèktu. For di e hopi, Dios a selektá ún.) Na Génesis 12:1-3 tambe por wak padilanti (Génesis 12-50). Djei, e trèktu ta bira hanchu atrobe. Abraham ta bira un famia grandi ku hopi desendiente.

Pues, e promé 11 kapítulo ta dediká na humanidat en general, mientras e último 39 kapítulo ta dediká na Abraham i su famia: bida di Abraham (12:1 – 25:18), bida di Isaak (25:19 – 26:35), bida di Jakòb (27:1 – 37:1), bida di Jose (37:2 – 50:26).

E proposito di e buki ta pa demonstrá kon Dios a prepará e puebel hebreo pa ta Su nashon skohí. Segun Cuthbert A. Simpson, tras di buki di Génesis por nota “Israel su konsiensia di para den un relashon úniko pa ku Dios, Kreadó i kontroladó di historia, fuente di tur rektitut, fundeshi di tur nifikashon. Proposito di e buki ta pa splika e realisashon di ta úniko, pa establese su balides, i pa mostra ku el a originá no dor di hende su boluntat, ma dor di Dios Su selekshon boluntario.”

H.A. Alleman a splika e proposito di e siguiente manera: “E outor di Génesis tabatin un plan spesífiko. Tabata su tarea pa preservá e storia—no di historia humano—ma e storia di salbashon. Pa e por logra su meta e mester konta e storia di komienso di bida, di hende, di piká, di speransa, di fe, mientras ku tras di tur esaki ta para Dios ku ta sin komienso i pa medio di kende tur kos ta eksistí...Nan [e hebreonan] tabatin un eksperensia grandi i úniko... Outor di Génesis...su proposito tabata pa konta kon Jehová a selektá Su puebel for di tur e puebelnan di mundu pa tin e eksperensia aki, i pa konta loke Dios a revelá di Su mes i loke El a forma di nan.”

- Ma ta inkorekto pa limitá e proposito di e buki eksklusivamente na e pueblo di Israel. G. Campbell Morgan ta haña ku Génesis su mensahe supremo ta Dios Su relashon pa ku hende i hende su relashon pa ku Dios.

Génesis ta revelá Dios Su interes pa tur hende. Si e Outor berdadero di Génesis (Dios) tabata solamente interesá pa ku Israel, E por a kuminsá e buki di Génesis ku e storia di Abraham komo welo di Jakòb, pasobra for di Jakòb a bin e diesdos tribu di Israel. Ma Dios ta interesá pa redimí humanidat por kompleto. Pesei El a inkluí Génesis 1-11. Israel ta Su manera pa yama hende—tantu hudiu komo pagano—pa bin serka djE!

Pues, por bisa ku un proposito di Génesis ta pa nota e komienso di historia di redenshon. E storianan ta selektá, no pasobra nan ta interesante, ma pasobra nan tin un relashon importante pa demonstrá kon Dios ta trata ku hende den Su gran proposito di redenshon. E storianan selektá ta tumá for di bida di hende den e antipasadonan di e Redentor primintí: Adam, Sèt, Noe, Abraham, Isaak, Jakob.

VI. STRUKTURA DI E BUKI

Klaramente Génesis por ser dividí den dos parti: kapítulonon 1-11 i kapítulonon 12-50. E divishonnan aki ta trata ku e siguiente tópikonan. Génesis 1-11 ta presentá e relato di historia general di hende. Klaramente kontenido di e sekshon aki ta hopi general. Kapítulonon 12-50 ta regardá historia spesífiko di e puebel di Dios. Ta opvio ku kontenido di e sekshon aki ta hopi mas detayá. Den kapítulonon 1-11, kuater evento ta destaká: kreashon, kaída, diluvio, i torno di Babel i e plamamentu ku a resultá. Den Génesis 12-50, kuater persona ta sobresalí: Abraham, Isaak, Jakòb, i Jose.

Hopi utor ta produsí skemanan siguiendo e patronchi aki. Lo siguiente ta un ehèmpel komún di un skema asina. (Ripará ku den e sekshon tokante e patriarkanan, e storia di un patriarka ta kuminsá promé ku historia di e patriarka anterior ta klousurá. Pa e motibu ei, e tekstonan indiká no ta kuminsá unda e sekshon anterior ta kaba.)

- I. Historia di Komienso – 1-11
 - A. Kreashon – 1-2
 - B. Kaída – 3-5
 - C. Diluvio – 6-9
 - D. Plamamentu – 10-11
- II. Historia di e Patriarkanan – 12-50
 - A. Abraham – 12:1 – 25:18
 - B. Isaak – 21:1 – 35:29
 - C. Jakòb – 25:21 – 50:14
 - D. Jose – 30:22 – 50:26

Otronan studiante di Beibel ta mira tres divishon den e buki. Segun G. Campbel Morgan, kapítulonon 1-2 ta trata ku generashon, degenerashon den kapítulonon 3-11, i finalmente regenerashon (12-50). Den e di dos divishon, nos por nota e degenerashon di personanan (p.e. Adam), degenerashon di famia (p.e. Kain i su desendientenan), i degenerashon di nashonnan (p.e. hende promé ku diluvio i na torno di Babel). Griffith Thomas tambe ta dividí e buki den tres sekshon: Konstrukshon (1-2), destrukshon (3-11), i rekonstrukshon (12-50). Òf nos por entitulá e mésun divishonnan: Komienso (1-2), kaída i konsekuensianan (3-11), i komienso nobo (12-50).

Ma tin un otro manera pa mira e buki—loke nos ya kaba a mensioná. Ta parse ku e utor mes a plania e struktura, usando e palabranan hebreo TOLEDOTH, ku ta nifiká “esaki ta historia” òf “esaki ta generashonnan”. E idea ta, “lo siguiente ta loke a sosodé ku e persona aki i su desendientenan.” E frase aki ta usá diesun biaha den e buki di Génesis:

- Introdukshon – 1:1 – 2:3
- I. “Esaki ta historia di e shelunan i tera” – 2:4 – 4:26
 - II. “Esaki ta historia di Adam” – 5:1 – 6:8
 - III. “Esaki ta historia di Noe” – 6:9 – 9:29
 - IV. “Esaki ta historia di” e yunan di Noe – 10:1 – 11:9
 - V. “Esaki ta historia di Sem” – 11:10-26
 - VI. “Esaki ta historia di Taré” – 11:27 – 25:11
 - VII. “Esaki ta historia di Ismael” – 25:12-18
 - VIII. “Esaki ta historia di Isaak” – 25:19 – 35:29
 - IX. “Esaki ta historia di Esau” – 36:1 – 37:1
- “Esaki ta historia di Esau” ta ripití den 36:6.

X. “Esaki ta historia di Jakòb” – 37:2 – 50:26

Pues, ripará ku Génesis ta konsistí prinsipalmente di un kompilashon di informashon (talbes 10 òf 11 diferente dokumento) tokante siertu famianan.

VII. OPSERVASHONAN DI E BUKI

Nos ke nota diferente punto relashoná ku e buki ku talbes por ta un yudansa pa komprendé e promé buki di Beibel mas mihó:

A. KRONOLOGIA DI GÉNESIS

Génesis ta kubri un periodo di miles di aña—por lo ménos 2000 aña. Ningun otro buki di Beibel ta kubri un periodo di tempu asina grandi. Komo resultado, e outor mester tabata sumamente selektivo pa kondensá 2000 aña di historia den 50 kapítulo. Pues, nos mester enfatisá ku e relato den buki di Génesis no ta un relato di historia so. E ta un interpretashon spiritual di historia.

Tin spekulashon tokante e lista di generashonnan den Génesis 5. Nan ta basá riba e pensamentu ku hende lo no a biba asina tantu aña literal (por ehèmpel, segun 5:5, Adam a biba 930 aña) i pues, e kantidat di aña ta referí na e suma di aña di bida di diferente persona—no ún persona so. Un teoria ta ku e nòmbernan ta representá un persona i tambe su desendientenan mas yegá, manera un dinastia. Segun e interpretashon aki, por ehèmpel, Adam i su desendientenan mas yegá (su dinastia) a biba 930 aña. Despues di esei, Sèt i su desendientenan a forma un dinastia di 912 aña. Èts. Segun e método aki, 8227 aña a pasa for di tempu di Adam te tempu di diluvio.

Ma tin un otro interpretashon—un interpretashon literal. Adam a biba 930 aña literal. El a haña un yu hòmer ku yama Sèt ora e tabatin 130 aña literal. Sèt a biba 912 aña literal. Èts. Segun e konteo aki, for di Adam te diluvio tabata 1656 aña.

E último interpretashon aki ta esun ku nos ta aseptá. Sinembargu ta impusíbel pa ta kategórikopu pa ku e kronologia di Génesis. Arsobispo James Ussher a kalkulá a base di e konteo aki ku Dios a krea mundu na aña 4004 B.C. Di nos perspektiva, Génesis 5 no ta duna suficiente informashon pa yega na un konklushon asina eksakto.

B. GENERASHONAN DI GÉNESIS

Ta komo si fuera Génesis ta un buki listando e generashonnan i ku kada bes e ta interumpí esaki pa presentá informashon nesario. Por haña generashonnan den shete diferente kapítulo: 4,5,10,11,25,36, i 49.

Manera nos ya kaba a trese dilanti, ta notable ku e outor di Génesis su prosedura ta pa lista generashonnan di esun sekundario promé ku e ta lista e generashonnan di e persona prinsipal. E ta deshasí di esnan no skohí pa Dios, anto ta sigui konta di generashonnan di esnan ku Dios si a skohe.

- Generashonnan di Kain (4) ta listá promé ku generashonnan di Sèt (5).
- Generashonnan di Jafèt i Kam (10:1-20) ta listá promé ku generashonnan di Sèm (10:21-32).
- Generashonnan di Taré (11) ta listá promé ku generashonnan di Abraham (12-50).
- Generashonnan di Lòt (19:29-30) i Ismael (25:12-18) ta listá promé ku generashonnan di Isaak (25-50).
- Generashonnan di Esau (36) ta listá promé ku generashonnan di Jakòb (37-50).

C. DIOS SU SELEKSHON DEN GÉNESIS

Dios Su selekshon soberano (especialmente pa ku diferente persona) ta notabel den Génesis :

- Dios a skohe hende na lugá di bestia pa pone Su imagen den dje – 1:26

- Dios a skohe Sèt na lugá di Kain - 4
- Dios a skohe Noe i su famia na lugá di otro hende pa skapa e diluvio – 6-9
- Dios a skohe Sèm na lugá di Jafèt i Kam - 10
- Dios a skohe Abraham na lugá di su rumannan – 11:26 – 12:3
- Dios a skohe Kanaan na lugá di tur otro parti di mundu – 11:27 – 12:7
- Dios a skohe Isaak na lugá di Ismael - 21
- Dios a skohe Jakòb na lugá di Esau – 25:19-28
- Dios a skohe Efraín na lugá di Manasès - 48
- Dios a skohe Huda na lugá di Ruben – 49:1-12

D. ONESTIDAT DI GÉNESIS

E tendensia humano ta pa pinta nos héroenan kasi komo hende perfekto, ku nan no sa faya. Ora nos ta konta storia di un hende apresiá, nos ta ignorá nan imperfekshonnan i talbes ta eksagerá nan bondat. Ma Beibel no ta skonde e imperfekshonnan di su héroenan. E buki di Génesis ta konta e relato onesto, manera el a sosodé. E no ta skonde e envidia di Kain, e buracheria di Noe, e inkredulidat di Abraham i Sara, e bida mundano i inestato di Lòt, e astusia i engaño di Rebeka i Jakòb, e engaño i krueldat di Simeon i Leví, e fayonan moral di Ruben i Juda, èts.

E. HENDE MUHÉ TA DESTAKÁ

Kompará ku algun buki di Beibel, hende muhé ta hunga un ròl importante den e buki di Génesis. Probablemente e dos dama ku ta sobresalí ta Eva, mama di e rasa humano (Génesis 2-4), i Sara, mama di e rasa hebreo (kapítulon 11-23). Ma otro dama tambe ta hunga un ròl prominente den Génesis. Lea, Raquel, Bilha, Zilpa (29:31 – 30:24) ta e mamanan di e diesdos tribu di Israel. Algun otro hende muhé ku ta haña atenshon spesial ta Hagar (16), esposa i dos yu muhé di Lòt (19), Dina (34), Tamar (38), esposa di Potifar (39)

F. LITERAL—NO SIMBÓLIKO—GÉNESIS 1-11

Suponé ku un hende na nos islanan ta kere ku kachó no ta eksistí. Kiko e persona aki ta hasi ora e ta topa un kachó? Talbes e ta yam’é un pushi, lobo, òf otro bestia. Kisas e por atimí ku e bestia ta parse loke algun hende ta yama “kachó”, ma e no por ta un kachó literal. Talbes e ta buska evidensia pa “proba” ku e no ta kachó. Kisas e ta bisa ku hende ta imginá ku e ta kachó—ku e no ta bèrdat. Maske ta muchu mas fásil pa aseptá ku kachó ta eksistí, e ta preferá splika tur manera pusibel ku no kachó no ta eksistí *pasobra el a disidí ya kaba ku kachó no ta eksistí*.

Ridíkulo ku esei por zona, e ehèmpel ei no ta leu di bèrdat. Hopi teólogo liberal tin e mésun rasonamentu. Nan mentalidat ta, “Segun mi, milager no ta eksistí! Pesei loke Beibel ta presentá komo milager, simpelmente no por ta milager.” Konsekuentemente, nan ta splika e echunan sobrenatural hañá den Génesis 1-11 na un forma simbóliko òf mitológiko. Nan ta pone nan mes komo outoridat supremo riba Beibel.

Ta di suma importansia pa nos aseptá Génesis 1-11 komo kapítulon literal. No por bisa esei ku muchu énfasis! Hende ta haña nan den tur sorto di siñansa falsu asumiendo ku Génesis 1-11 no por ser tumá na un forma literal. Nos ta keda para firme riba e regla di hermenutika (reglanan di studia Beibel): Si bo por komprendé e teksto manera e ta (literal), komprendé asina. Si e sintido literal ta komprendibel, no buska un nifikashon simbóliko.

Pues, Dios literalmente a krea shelu, tera, hende, èts. Adam i Eva a komo fruta literal. Tabatin un inundashon literal ku a tapa mundu. Hende a biba hopi aña literal.

VIII. KONTENIDO DI E BUKI

Nos ke pensa en korto tokante diferente parti di kontenido di Génesis. Pasobra esaki ta un estudio introdutorio, nos no por hasi un estudio detayá. Sinembargu nos lo hasi algun opservashon—tumando mas tempu ku algun tekso, mientras nos ta salta otro teksto.

Kapítulonon 1-11

Beibel ta un buki ku a originá ku Dios. Kada buki, kada kapítulo, kada versíkulo i frase den Skritura ta lora rònt e persona di Dios. Ora nos ta kòrda esei, ta remarkable pa nota ku Palabra di Dios no ta kuminsá ku un òf otro argumento pa proba ku Dios ta eksistí. E teksto simpelmente ta habri asumiendo Dios Su eksistensia. Pues, sin ekskusa òf argumento, e promé tres palabra di e promé buki di Beibel ta, “Na prinsipio Dios...” (Génesis 1:1). Esaki ta skirbí pa e Úniko ku ta kualifiká pa skirbié—Dios mes.

Génesis 1:1 ta krusial, “Na prinsipio Dios a krea e shelunan i tera.” Segun Robert Boyd, “Si bo di bèrdat ta kere e teksto aki, lo bo tin poko difikultat pa kere tur sobrá di Palabra di Dios. Génesis 1:1 ta refutá tur otro filosofia. Ateísmo ta falsu pasobra Dios ta eksistí. Materialismo ta falsu pasobra kos material tabatin un komienso. Panteísmo ta falsu pasobra Dios ta distinto for di Su kreashon. Politeísmo ta falsu pasobra tin solamente ún Dios. Evolushon ta falsu pasobra e shelunan i tera a wòrdu kreá.”

Shete biaha den kapítulo 1 di Génesis, nos ta enkontrá e ekspreshon, “Dios a bisa: ‘Laga tin...i asina tabata’ (1:3,6,9,11,14,24,26) òf un ekspreshon similar. Dios no a tuma algu i forma algu otro for di dje. Dios a forma algu for di *nada*. Teólogoanon ta yama e forma di kreashon “EX NIHILO”, es ta ku Dios a krea algu for di nada. Esei ta e poder sobrenatural i inkomprensibel di Dios Su palabranan! “Dios a yama na eksistensia loke no ta eksistí (Romanonan 4:17; Hebreonan 11:3; Salmo 33:6,9; 148:5).

Segun H.C. Leupold, e storia di e kreashon ta presentá “un Dios ku por wòrdu stimá i adorá den akshon di tal forma ku hende lo hinka rudia ora e ta kontemplá e obra di Dios pa mundu i hende por eksistí.”

E relato di kreashon ta simple, ma bunita. E promé tres día, Dios a forma diferente kos (lus, firmamentu, tera i laman). Den e siguiente tres dia, Dios a yena loke El a forma. E énfasis ta ku El a krea tur kos perfekto pa hende. Despues El a krea hende.

Kapítulo dos ta elaborá detayadamente Dios Su kreashon di hende menshoná den 1:26-30. Dios a krea hende i pon’é den un ambiente sumamente favorabel...di bèrdat, perfekto. Den un ambiente, unda hende tabatin komunion habrí ku Dios, El a duna nan ún restriksion so: no kome fruta di e palu di konosementu di bon i malu.

Dios a krea hende di tal forma ku nan por tin nan propio boluntat. Ma, segun Génesis 3, hende a skohe pa desobedesé Dios. Nan piká tabatin konsekuensia serio. Tabatin tantu un afekto spiritual (nan komunion íntimo ku Dios a kibra), un afekto físiko (e proseso di morto a inisiá i doló na momento di parto), un afekto familiar (e relashon entre esposo i esposa a keda afektá), komo un afekto pa ku kreashon (tera a bira ménos fruktifero i a produsí sumpiña). Dios a ekspulsá Adam i Eva for di e hòfi di Eden.

Génesis 4 i 5 ta introdusí morto den e rasa humano. E promé morto menshoná ta un asesinato: Kain a mata Abel. Loke ta sigui den kapítulo sinku ta zona manera klòk di misa pa un entiero: bam—“el a muri”, bam—“el a muri”, bam—“el a muri”—ocho biaha.

Huntu ku e mortonan, e teksto ta indiká kon bida tabata e tempu ei (4:17-26; 6:1-8). Klaramente kos a peorá. Hende a degenerá. Lamek a gaba di su violensia. Den tempu di Noe, violensia a para bira normal.

E diluvio deskribí den Génesis 6-9 tabata Dios Su kastigu riba mundu. Ma na mésun tempu, el a demonstrá Dios Su grasía. Maske e diluvio mundial a destruí tur hende, El a spar ocho persona: Noe i su famia, pa por tin un komienso nobo.

Despues di e diluvio (kapítulonon 9-11), maske Dios a bendishoná hende di nobo i a introdusí sierto kambio, tòg hende atrobe a degenerá. Por nota esei den e yunan di Noe mes. Por

nota e rebeldia den nan desendientenan—entre otro den Nimród. E tornu di Babel tabata un esfuerso humano pa halsa nan mes i krea Dios den nan mes imagen. Komo resultado, Dios a pone limitashonnan i separashon geografiko i lingwistiko pa hende no uni i rebeldiá.

Lesando e promé 11 kapitùlo di Génesis, bo ta kapas di keda deprimí. Kon un storia ku a kuminsá asina bunita por degenerá yega na idolatria asina mahós?

Ma tur esaki ta introdusí Dios Su estrategia grasioso. Su gracia ta bin na lus klaramente den e di dos sekshon di e buki, Génesis 12-50, pasobra awor ta kuminsá e storia di Dios Su plan pa revelá Su mes na humanidat dor di un hòmber i su famia.

Kapítulonon 12-50

E importansia di kapitùlonon 1-11 ta obvio. Ma ta notabel ku prioridat di e outor di e buki ta kapitùlonon 12-50. Moisés a dediká 20% di Génesis pa konta di eventonan importante ku a tuma lugá durante un periodo di miles di aña. En kontraste, kasi 80% di e buki ta reservá pa konta e storia di Abraham, Isaak, Jakòb, i Jose, eventonan ku a sosodé den ménos ku 400 aña. (Talbes esaki ta hala nos atenshon na e echu maravioso ku Dios ta mas interesá den hende (abo tambe) ku E ta pa ku henter e universe ku El a krea!)

Ora nos ta enkontrá Abraham pa promé biaha den e buki, e no ta introdusí komo un hòmber rekto i santu. Talbes e tabata adorá ídolonan ora Dios a skoh'é (12:1-3). Ma Dios a bis'é pa bandoná su famia i tera i a primintí ku E lo dun'é su mes tera i famia. I Abraham a obedesé Dios.

E storia di Dios Su yamada di Abraham ta sumamente importante. Génesis 12:1-3 ta fundamental pa komprendé sobrá di e buki...di bèrdat pa komprendé e restu di Beibel. Dios a primintí pa bendishoná Abraham, su desendientenan, i henter mundu si e ta obedesé Dios. Den e teksto aki nos por mira Dios Su deseo pa *tur humanidat* yega na salbashon, no hudiunan so.

Génesis 12-22 ta un bunita relato di Abraham su konfiansa—i tin ora, falta di konfiansa—den Dios. E outor a kirbi e relato di tal forma ku e lesadó ta keda ku duda kon e storia lo kaba. Diferente menasa òf obstakulo ta presentá pa ku e kumplimentu di Dios Su promesa.

Den 12:10-20, Abraham i Sara a bai Egipto pa skapa hamber den e tera. E menasa tabata ku Sara a hera bira parti di Farao su “harem” i pues su yu lo no ta desendiente di Abraham. Dios a intervení pa skapa nan promé ku a yega asina leu.

Lòt, sobrino di Abraham, pusibelmente tabata un obstakulo pa kumplimentu di e promesa. Talbes Lòt lo tabata erederero si Abraham a fayesé. E obstakulo a wòrdu kitá ora Lòt a separá for di Abraham (Génesis 13).

Mas tempu a pasa, i Abraham no tabatin yu. E sirbidó prinsipal di Abraham, Eliezer, tabata e erederero (15:2). Dios a sigurá Abraham (den kapitùlo 15) ku su propio yu lo ta su erederero i ku E lo dun'é e tera despues di 400 aña (15:13).

Dies aña despues di Dios Su promesa original, ainda Abraham i Sara no tabatin yu. Segun kustumber di e era ei, Sara a surgerí pa Abraham tuma un di su kriánan komo un esposa supstituto pa e por haña yu kun'é. Asina Ismael a nase ora Abraham tabatin 86 aña (Génesis 16).

Ta parse ku Abraham a asumí ku Ismael tabata e erederero primintí durante e siguiente 13 aña. Talbes Abraham a spanta ora Dios a inform'é ku e erederero lo nase di Sara (kapitùlo 18). Atrobe tabatin menasa ku Sara lo bira parti di “harem” di un rei, Abimelek. Si esei sosodé, asta pa un ratu so, i Sara haña yu, lo tin duda ku ta yu di Abraham. Atrobe Dios a intervení pa protehá Sara.

Porfin e yu primintí, Isaak, a nase (21:1-6). E lesadó lo pensa ku henter e problema ta solushoná porfin. Ma mes ora ta lamta e pregunta, kiko tin ku hasi ku Ismael. Abraham ta mand'é bai (21:8-20).

Un menasa mas serio ta presentá. E otro problemanan tabatin un orígen humano. Ma awor Dios—e mésun Dios ku a primintí un erederero pa Abraham—ta pidi Abraham pa sakrifiká

su yu. Esaki ta un menasa divino. Den kapítulo 22, Abraham a demonstrá su konfiansa total den Dios dor di hasi presis loke Dios a instruí. Komo resultado, Dios atrobe a primintí ku E lo kumpli ku Su promesa di desendiantenan.

Dios a primintí ku e tera lo ta di Abraham su desendiantenan. Kapítulo 23 ta menshoná e úniko okashon ku Abraham ta haña asta un pida di e tera primintí...graf di Sara.

Ma tin un otro problema. Maske Abraham a haña e eredero primintí, e yu ei mester kasa pa e por tin e multitud di desendiente ku Dios a primintí. Si e kasa ku un muhé di Kanaan, pronto e desendiantenan di Abraham lo no ta un grupo distinto mas. Pesei Abraham a manda su sirbidó pa buska un esposa pa Isaak for di su famianan na Mesopotamia (Génesis 24).

Den e buki di Génesis, Isaak ta e patriarka ku ta destaká ménos. El a biaha ménos i tabatin ménos aventura. El a biba mas aña ku e otronan. E storianan durante bida di Isaak ta trata prinsipalmente ku e lucha entre su yunan, Jakòb i Esau. E konflikto tabata asina serio ku atrobe tabatin peliger ku Dios Su promesanan na Abraham i su desendiantenan lo no wòrdu kumplí (27:44-45; 32)...si Esau mata Jakòb.

E storianan di Jakòb no solamente ta laga sa kon e famia a krese. Nan ta muestra tambe mas menasa pa ku Dios Su aliansa ku e desendiantenan di Abraham. Tabatin e peliger ku Jakòb kedando na Haran pa 20 aña, su identidat di e famia distinto por bai pèrdí. Ademas ta pusibel ku por tabatin un menasa serio di parti di Laban (31:22-29), Esau (32:3-12), i pusibelmente di amigunan di e sikemitanan (34:25-31).

Ademas, e storianan di Jakòb ta muestra bon kla ku pa kuminsá Jakòb no tabata un hòmber spiritual i rekto manera Abraham. Jakòb a buska su propio interes i tabata un gañadó formal. Dios lo hasi Su aliansa núlo pa motibu di esei? E kontesta ta resoná kla, “nò!”. Dios ta fiel pa kumpli ku Su promesanan apesar ku Jakòb tabata infiel. Ma Dios a obra tambe pa transformá Jakòb den Génesis 32.

Kapítulon 34 te 38 ta konta diferente storia tristu tokante e yunan di Jakòb. Génesis 34 tin e relato kon nan a yega na un akuerdo pa Dina, nan ruman muhé kasa ku Sikem, un pagano, anto ku Simeon i Leví a mata tur hende hòmber di e stat. Segun 35:2-5, ta parse ku nan tabatin otro diosnan. Den 35:22, Ruben, Jakòb su yu mayor, a tene relashon seksual ku Bilha, Jakòb su konkubina. Kapítulo 37 ta konta kon nan tabata kla pa mata Jose, ma despues a disidí pa bend'é komo un katibu—algu ku no tabata muchu mas mihó. Den Génesis 38, Juda tin relashon seksual ku su nuera. Maske Juda no tabata sa ku ta su nuera, tòg su inmoralidat ta kondenabel. Ta parse ku e outor ta laga sa ku e relatonan aki ku e yunan di Jakòb tabata adoptá e sistema di bida baho di e kananeonan pagano, loke lo nesésitá pa Dios saka nan for di entre e kananeonan dor di manda nan na Egipto.

Ma Jose tabata un eksepsion. Ta parse ku deseo di su kurason tabata pa sigui Dios—meskos ku su tata, Jakòb. (Talbes ta pesei Jakòb a stima Jose mas ku su otro yunan.) Den tur e detayenan trágiko di su bida, nos por nota ku Jose no a lubidá e Dios di su tata (39:2,3,5,21,23; 40:8; 41:16,25,28,32,51,52).

Un parti grandi di Génesis ta dediká na e relato bunita tokante Jose (kapítulon 37-50). Pakiko? E storia di Jose ta muestra kon e desendiantenan di Abraham a yega na Egipto. Di e forma aki, e outor ta prepará e lesadó pa e storianan di e buki di Eksodo. (Ora Génesis ta klousurá, e desendiantenan di Abraham ta un famia. Ora Eksodo ta habri, nan ta un nashon.) Maske Dios Su promesa no ta menshoná hopi den e sekshon aki, ta klaro for di e storia di Jose ku Dios ta soberano den e eventonan di historia.

Henrietta Mears a skirbi, “E buki di Génesis ta habri ku ‘Dios’ i ta klousurá ku un ‘kaha di morto’. Esaki ta un buki di historia di frakasonan di hende. E ta un Salvador glorioso. Nos ta haña ku ‘kaminda piká a oumentá, grasía a abundá muchu mas’ (Romanonan 5:20).”

Literatura Konsultá

- Archer, Gleason L. Jr. *A Survey of the Old Testament Introduction* (Chicago: Moody Press, 1994), p. 185-225.
- Baxter, J. Sidlow. *Explore the Book* (Grand Rapids: Zondervan Publishing House, 1960), vol. 1, p. 21-72.
- Boyd, Robert t. *Boyd's Bible Handbook* (Eugene, Oregon: Harvest House Publishers, 1983), p. 29-52.
- Demaray, Donald E. *Bible Study Sourcebook* (Los Angeles: Cowman Publishing Company, 1964), p. 64-65
- Dillard, Raymond B. & Logman III, Tremper. *An Introduction to the Old Testament* (Grand Rapids: Zondervan Publishing House, 1994), p. 37-56.
- Douglas, J.D. organizing ed. *The New Bible Dictionary* (Grand Rapids: Wm. B. Eerdmans Publishing Co. 1962), p. 460-462.
- Halley, Henry H. *Halley's Bible Handbook* (Grand Rapids: Zondervan Publishing House, 1964), p. 62.
- Harrison, Ronald Kenneth. *Introduction to the Old Testament* (Grand Rapids: William B. Eerdmans Publishing Company, 1969), p. 542-565.
- Hill, Andrew E. & Walton, John H. *A Survey of the Old Testament* (Grand Rapids: Zondervan Publishing House, 1991), p. 90-104.
- Hinson, Edward E. and Kroll, Woodrow Michael. gen. ed. *Liberty Bible Commentary* (Lynchburg, Virginia: The Old-Time Gospel Hour, 1982), p. 1-7.
- Jensen, Irvin, L. *Jensen's Survey of the Old Testament* (Chicago: Moody Press, 1978), p. 63-82.
- Leupold, H.C., Tenney, Merrill C. ed. *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 2, p. 678-695.
- Leupold, Herbert.Carl. *Expositon of Génesis* (Grand Rapids: Baker Book House, 1974), vol. 1 p. 5-34.
- Lockyer, Herbert. gen. ed. *Illustrated Bible Dictionary* (Nashville, TN: Thomas Nelson Publishers, 1986), p. 411-414.
- MacArthur, John. *MacArthur's Quick Reference Guide to the Bible* (Nashville, TN: W Publishing Group, 2001), p. 1-6.
- McGee, J. Vernon. *Thru the Bible with J. Vernon McGee* (Nashville, TN: Thomas Nelson Publishers, 1981), p. 1-3.
- Mears, Henrietta C. *What the Bible is All About* (Minneapolis: World Wide Publications, 1966), p. 15-32.
- Miller, Adam W. *Brief Introduction to the Old Testament* (Anderson, Indiana: Warner Press, 1964), p.
- Pfeiffer, Charles F. ed. *The Wycliffe Bible Commentary* (Chicago: Moody Press, 1962), p. 1-2.
- Pink, Arthur W. *Gleanings in Génesis* (Chicago: Moody Press, 1922), p. 5-8.
- Richards, Lawrence O. gen. ed. *The Revell Concise Bible Dictionary* (Tarrytown, New York: Fleming H. Revell Company, 1991), p. 240-242.
- Ross, Allen P. editors: Walvoord, John F. & Zuck, Roy B. *The Bible Knowledge Commentary* (Wheaton, IL: Victor Books, 1986), p. 15-27.
- Schrader, Stephen R. Hindson, Edward E. & Kroll, Woodrow Michael. gen. ed. *Liberty Bible Commentary* (Nashville, TN: Thomas Nelson Publishers, 1982), p. 1-7.
- Sailhamer, John H. Gaebelein, Frank. E. ed. *The Expositor's Bible Commentary*: (Grand Rapids: Zondervan Publishing House, 1990), vol. 2, p. 3-18.

Unger, Merrill F. *Introductory Guide to the Old Testament* (Grand Rapids: Zondervan Publishing House, 1956), p. 189-195.

Unger, Merrill F. *Unger's Bible Handbook* (Chicago: Moody Press, 1967), p. 36-37.